


ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՀԱՄԱԿԱՐԳԻ  
ՁԵՐԲԱԿԱԼՎԱԾ ԱՆՁԱՆՑ ՊԱՀԵԼՈՒ ՎԱՅՐԵՐՈՒՄ ՎԵՐԱՀՄԿՈՂՈՒԹՅՈՒՆ  
ԻՐԱԿԱՆԱՑՆՈՂ ՀԱՍԱՐԱԿԱԿԱՆ ԴԻՏՈՐԴԱԿԱՆ ԽՈՒՄԲ

№ 2621/1477

25.10.2014թվ.

ՀՀ Ոստիկանության պետ,  
գեներալ-լեյտենանտ  
պարոն՝ Վ. Գասպարյանին



Հարգելի պարոն Գասպարյան,

Սույն թվականի հոկտեմբեր ամսին Դիտորդական խումբը այցելություն կատարելով ՀՀ ոստիկանության Լոռու ՄՎ Թումանյանի ՁՊՎ արձանագրել է մի շարք թերություններ և խախտումներ:

Թերություններ՝

1. ՁՊՎ-ի միջանցքից դեպի զբոսաբակ տանող հատվածը ամբողջությամբ գտնվում էր ջրի մեջ, որը ՁՊՎ-ի տարածք է ներթափանցում բաժնի երկրորդ հարկից և անհնարին էր անցնել դեպի զբոսաբակ: /կից ներկայացվում է փաստը հաստատող լուսանկարներ - 1,2/
2. ՁՊՎ-ում բացակայում էր լոգանքի համար նախատեսված տաք ջուրը, չէր գործում ջրատաքացուցիչը:
3. Բուժսենյակը համատեղված էր քննչական սենյակի, հերթապահ ոստիկանի սենյակի հետ և գտնվում էր ռեժիմային գոտում:

Խախտում՝

ՁՊՎ-ում առկա էր ըստ ՁՊՎ-ների ներքին կանոնակարգի պահանջների <<Ձերբակալված անձանց բուժզննության և բուժօգնության>> գրանցամատյանը, միաժամանակ ՁՊՎ-ում առկա էր անհասկանալի գրանցամատյան <<Ձերբակալված և կալանավորված անձանց թարմ մարմնական վնասվածքների հաշվառման>>: Այս ամենի տարօրինակն այն է, որ ըստ ՁՊՎ-ի վարչակազմի բուժզննությունն իրականացվում է հրավիրված շտապօգնության բժիշկների




կողմից, բայց հրավիրված բժիշկը համապատասխան գրանցամատյանում մարմնական վնասվածքները չի գրանցում: Առկա մարմնական վնասվածքների վերաբերյալ ՁՊՎ-ի վարչակազմը գրառում է կատարում <<նորաստեղծ>> <<Ձերբակալված և կալանավորված անձանց թարմ մարմնական վնասվածքների հաշվառման>> գրանցամատյանում: / կից ներկայացվում է փաստը հաստատող լուսանկարներ – 3,4/

Դիտորդական խումբը կարծում է, որ պետք է միջոցներ ձեռնարկվի, որպեսզի հրավիրված շտապօգնության բժիշկները արձանագրեն առկա մարմնական վնասվածքները, այլ ոչ թե վարչակազմը միջոցներ ստեղծի դրանք կատարելու համար:

Այսպիսով՝ խնդրում ենք ուսումնասիրել փաստերը և տալ մեկնաբանություն ներկայացվածի վերաբերյալ:

Հարգանքով՝

ՀՀ ոստիկանության համակարգի ձերբակալված անձանց պահելու վայրերում վերահսկողությունն իրականացնող հասարակական Դիտորդական խմբի նախագահ՝



Ն. Սահակյան





## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՇՏԱԲ

375025, ք. Երեւան, Նալբանդյան 130 հեռ. 59-65-94

N 2/2-1-2980

<<17>> 11 2014թ.

Ձեր 25.10.2014թ. թիվ 2621/1477 գր.

### «Ոստիկանության համակարգի ձերբակալվածներին պահելու վայրերում հասարակական դիտորդների խմբի նախագահ

տիկին Հ. Սահակյանին

#### Հարգելի տիկին Սահակյան

Հայտնվում է, որ դիտորդների խմբի կողմից 2014թ. հոկտեմբեր ամսին «Ոստիկանության Լոռու մարզային վարչության Թումանյանի բաժնի ձերբակալվածներին պահելու վայր կատարած այցելության ընթացքում արձանագրված խախտումները և թերություններն ուսումնասիրվել են «Ոստիկանության շտաբում և Լոռու մարզային վարչությունում:

«Ոստիկանության Լոռու մարզային վարչության կողմից տրամադրված տեղեկատվության համաձայն ներկայացվում են ներքոշարադրյալ մեկնաբանությունները:

1. 2014թ. հոկտեմբերի 10-ին բաժնի վարչական շենքի երկրորդ հարկի սանհանգույցի ջրատար խողովակը հնամաշ լինելու պատճառով վնասվել է, ինչի հետևանքով ջուրը առաստաղից թափվել է ՁՊՎ-ի միջանցք՝ խոնավեցնելով և վնասելով պատերը: Վնասված խողովակը ներկայումս նորոգվել է, իսկ պատերը չորանալուց հետո ՁՊՎ-ի միջանցքում կկատարվեն վերանորոգման աշխատանքներ:

2. ՁՊՎ-ի ջրատաքացուցիչը ներկայումս վերանորոգվել է և աշխատում է անխափան:

3. Ոստիկանության Թումանյանի բաժնի վարչական շենքը կառուցվել է խորհրդային տարիներին, ուստի շենքային սուղ պայմաններից ելնելով բուժսենյակը համատեղված է քննչական սենյակի հետ, որը հնարավորության դեպքում օգտագործվում է նաև որպես ոստիկանի հանգստի համար:

Հարկ է նշել, որ ոստիկանության Թումանյանի բաժնի ՁՊՎ-ում պահվող անձանց թվաքանակը շատ փոքր է (2013թ. ՁՊՎ-ում պահվել է 38 անձ, 2014թ. 9-ը ամիսներին 24 անձ) ուստի բուժզննության և քննչական գործողություններ կատարելու գործընթացները երբևէ չեն համընկել և հնարավոր են լինում նշված գործողությունները կատարել առանց խոչընդոտների:

4. Ոստիկանության Թումանյանի բաժնի ՁՊՎ-ում գտնվող «Ձերբակալված և կալանավորված անձանց թարմ մարմնական վնասվածքների հաշվառման»



գրանցամատյանը կազմվել է ՁՊՎ-ի վարչակազմի կողմից՝ ներքին վարման նպատակով, գրանցելու մարմնական վնասվածքներով ՁՊՎ ընդունված անձանց տվյալները, հետագայում մարմնական վնասվածքներով անձանց վերաբերյալ արագ հաշվետվություններ ներկայացնելու համար: Նշված գրանցամատյանը հանդիսանում է զուտ աշխատանքային տետր և գրառումները կատարվում են միայն ՁՊՎ վարչակազմի կողմից: Այն առանձնացվել է ՁՊՎ գործունեությանը վերաբերվող ձևաթղթերից ու գրանցամատյաններից:

ՁՊՎ-ում գործում է ՀՀ կառավարության թիվ 574-Ն որոշմամբ սահմանված (հավելված ձև 12) «Ձերբակալված անձանց բուժզննության կամ բուժօգնության» գրանցամատյանը և հրավիրված բուժաշխատողները բուժզննություն կամ բուժօգնություն իրականացնելիս համապատասխան գրառումները կատարում են նշված գրանցամատյանում:

**ՀՀ ոստիկանության շտաբ**